

QK.303 18


v. Metzsch (X1993179)

Z c
6385

Eine Reichpredigt /
Geschehen bey dem Begrebnis der Chri-
stlichen / Edeln vnd viel tugentsamen Frauen/
Katharina Metzschin auff Mula / geborne
von Bunaw auff Elsterberg /

Durch

M. Augustin Dölken / jetziger zeit
Diacon zu Reichenbach / am
XXIII. Octob.



UNIVERSITÄTS-BIBLIOTHEK
HALLE (SAALE)

BIBLIOTHECA
PONICKAVIANA

Gedruckt zu Witteberg durch
Lorenz Schwencck.

1 5 6 2,
20



1793

Handwritten text, possibly a title or address, mostly illegible due to fading.

Handwritten text, possibly a date or recipient information, mostly illegible.

Handwritten text, possibly a signature or name, mostly illegible.



Der Ethen vnd viel

Zugentsamen Frawen Katharina von
Bunaw/ widwe / auff Elsterbergk vnd Christ-
grün etc. Wenlandt Herrn Otto Spiegels
Ritters vnd der Rechten Doctors Doch-
ter/ meiner grosünstigen Fra-
wen vnd Fürderer.

Gottes gnad vnd fried in Christo
Ihesu vnserm Heiland
beuor.

EDE / Zugentsame Frawe /
Mir ist viel gesagt von E. E. son-
derlichen lust vnd freud/ zu der Trost-
reichen lerb des Euangelij / die aus
Gottes gnaden/ zu vnsern zeiten / wider durch
den heiligen Man / Doctor Martin Luther /
heiliger gedechtnis/ an tag vnd ans liecht bracht
ist. Hab derhalben oft gewünscht/ mit E. E.
kündig zu sein / Denn was kan ons Predigern
lüstigers sein auff erden? denn mit den gefessen/
die da Tempel vnd wonung Gottes sind / ge-
sprech zuhalten / des heiligen Geistes vnd des
HEXen Christi reden zuhören / Wie denn der
Spruch lautet/ Wo zween oder drey versamlet
A ij sind

sind in meinem Namen / da bin ich mitten un-
ter jnen.

Wir sehen / was der welt trachten vnd wan-
del ist / wie es in viel Regimenten / Haushal-
tungen / vnd vieler Menschen leben teglich zuge-
het / Welches wir Prediger denn mit grossen
schmerzen vnd wehklagen müssen ansehen / das
vns offtmals vnsers Ampts / aus Menschlicher
schwacheit / verdreust / das wir mit vnserm vleiß-
sigen predigen bey der vndanckbaren welt / so gar
wenig ausrichten / Als denn Elias / der heilige
hohe Man / so hoch dadurch bewegt wurde / das
er in die wüste flohe / sich vnter eine Wachholdern
setzte / vnd bat / das seine seel stürbe.

Man hört vns prediger so lang man wil / ge-
felt es der welt nicht / so gehets vns / wie den Ha-
sen / da sie den Lewen wolten Predigen / wie in
einem gedicht gedeutet ist / Do doch vnser ampt /
das aller höchst ist auff erden / vnd ein ampt weit
vber alle empter / Vnd die welt sich gegen vns
neigen solt / ob wir gleich arme / verechtliche per-
son sind / Aber vnser Trost ist / das Gott noch et-
liche heilige gefes hat / vnd sein Wort nicht wil
vergeblich lassen gepredigt werden / so wenig als
der Regen nicht one nutz auff s erdreich felt / Als
Gott im Propheten Esaia am 55. Capitel sagt.
Gleich wie der regen vnd schnee / vom Himmel fel-
let /

let/ vnd nicht wider dahin kompt/sondern feuch-
tet die erden/vnd machet sie fruchtbar vnd wach-
sen/das sie gibt samen zu seen vnd brod zu essen /
Also sol das wort/ so aus meinem munde gehet /
auch sein/ Es sol nicht wider zu mir leer komen /
sondern thun das mir gefellet/ vnd soll jm gelin-
gen/dazu ichs sende.

Weil ich denn jzt nach dem Abschied Ewer lie-
ben Tochter/der Gottsfürchtigen Tugentsamen
Frauen Katharina Metzschin/die E. E. lieb ge-
wesē/gleich vrsach gehabt mit E. E. gesprech durch
schrifften zuhalten/obersende ich E. E. diese Trost
predigt/so ich ober dem Begrebnis / nach verlei-
hung Göttlicher gnadē/gethan habe/Vnd befeh-
le E. E. dem lieben Gott im Himmel/der wollet E. E.
in solchem grossen schmerzen trösten vñ stercken /
Denn weil E. E. den abschied nacheinander
ewer Töchter/bis auff die Jüngste/die doch auch
nicht one Kreuz ist/in irem alter/mus anhören/
geschicht fürwar solchs nicht one gros bewegung
des mütterlichen hertzens / Gott aber wil aller
betrübten Tröster sein / Daran wird sich one
zweuel E. E. wissen zu halten. Datum Rei-
chenbach den 23. Nouembris. Anno 1562.

E. E.

W.

M. Augustinus Dolscius.

A iij

Eine

Eine Leichpredigt /
Geschehen bey dem Begrebnis der Chri-
stlichen / Edeln / vnd viel tugentsamen Frauen
Katharina Metzschin auff Mula etc. Aus
der 1. Epistel Pauli an die Thessa-
lonicher am iiii. Capitel.

WIr wollen euch aber / lieben
Brüder / nicht verhalten von de-
nen / die da schlaffen / auff das jr
nicht traurig seid / wie die andern
die keine hoffnung haben / Denn
so wir glauben / das Ihesus ge-
storben vnd auferstanden ist / so wird Gott auch
die da entschlaffen sind durch Ihesum / mit jm
führen / Denn das sagen wir euch / als ein wort
des HERRN / das wir / die wir leben vnd oberblei-
ben / in der zukunfft des HERRN / werden denen
nicht vorkomen / die da schlaffen / Denn er selbs
der HERR wird mit einem Feldgeschrey vnd
stimme des Erhengels / vnd mit der Posaunen
Gottes hernider komen vom Himmel / vnd die
Todten in Christo werden auferstehen zu erst /
darnach wir die wir leben vnd oberbleiben / wer-
den zugleich mit denselbigen hingezuckt werden
in den wolcken / dem HERRN entgegen in der
Lufft /

A ij

Lufft /

Lufft / vnd werden also bey dem HERRN sein
allezeit / So tröstet euch nu mit diesen worten
vntereinander.

D Eliebten in dem HERRN Christo/
Wir hören hie in diesem vorlesenen
text / das der heilige Geist / vom ster=
ben der Menschen gar eine andere
sprach füret / den die vernunfft pflegt
zu reden / Welche vom Todt also re=
det / das er sey ein abkürtzung vnd
vertilgung des lebens / Item / ein ablösung der Seel
vom Leib / Aber der Heilige Geist spricht / das der
Todt nicht sey ein trennung des Leibs von der Seel /
oder ein ausleschung des Menschlichen lebens / son=
dern nur ein schlaff / Vnd heist es nicht gestorben sein /
sondern entschlaffen.

Gleich wie auch das Korn / gersten / weitz vnd
andere Samen / so der Ackerman auff den acker seet /
nicht todts vnd vnkressftig geacht werden / ob sie wol
das ansehen haben / als sind sie todts / Es würde war=
lich sonst der Hausuater nicht so viel mühe vnd er=
beit mit velgen / schrotten / schlichten / ackern / ehegen /
vnd anderer Felderbeyt darauff wenden / Sondern
seinen Samen viel lieber auff dem Kornboden ligen
lassen / so solch sein seen / vnkressftig / todts vnd nich=
tig sein solt.

Aber trutz einem einigen Menschen auff erden /
der do anders nur im Sommer hernach auff dem
weiten feld herum gebet / seine augen auffthut / vnd
das Getreide vnd anders ansihet / Aber in den gerten
spacirt / da mancherley Samen / ein vleissige Haus=
mutter

mutter geseet hat / die ire schöne gewechs dir gleich
für die augen halten / Trutz sage ich / das du sprechest /
diese Körnlin vnd samen / so entweder im Herbst / oder
im Fröling geseet / vnd jr gewechs itzt weisen / seien
todter Samen vnd todte Körnlein gewest.

Ja ein Kind von fünff oder sechs Jaren / würde zu
dir sagen / Du Narr / weistu nicht die sprach aller
Menschen / das diese Körnlein / die ins erdreich ge=
worffen werden / nicht todte sind / vñ je mehr sie verwe=
sen vnd verfaulen / je mehr krefftiger sie werdē / schöner
vnd lieblicher / vnd ist die verwesung keine verwesung.

Also nun auch ist das die sprach des heiligen
Geistes vom sterben der Menschen / das es kein sterbē
vnd kein verwesung sey / sondern nur ein schlaff / Vnd
wie nu ein schlaffender nicht todte ist / sondern seine
kreffte vnd das leben noch hat / Also ist die hand vol
asch / oder staub / so aus dem verstorbenen Cörper end=
lich wird / nicht ein todte ding / sondern hat noch ein
verborgene kreffte des lebens / die man auff den zu=
künfftigen Sommer der Auferstehung der Todten /
öffentlich sehen wird / wenn der Son Gottes / der
HERR IHESVS CHRISTVS / mit der
Stim des Ertzengels vnd mit der Posannen Gottes
vom Himel hernider komen wird / vnd das feldge=
schrey lassen ergehen / Surgite, Surgite, stehet auff / ste=
het auff jr Menschen.

Denn wie der Samen des Ackers oder gartens /
durch Gottes allmechtigkeit / ein lebendiges wesen
im erdreich hat / also hat der todte Cörper / durch die
wirckung des Sons Gottes / noch sein leben / vnd kan
der todte das leben nicht verschlingen / Wird auch
durch solche Göttliche kreffte vnd bewegung des hei=
ligen

ligen Geistes / in der gemeinen aufferweckung herfür
komen / vnd gantz ein newer Mensch sein.

Denn wie durch schlaffen eines Menschen kressft/
stercker / reiner vnd lustiger werden auff den Morgen/
denn sie an dem vorgehenden Abend gewesen sind /
Dergleichen auch wird durch das sterben vnd verwe-
sen der Cörper des Menschen / der in dem itzigen le-
ben voller vnflut / beschwerung / gebrechlichkeit /
francckheit vnd seuchen ist / auff den rechten lieblichen
morgen der zukunfft des DERN / viel andere kressft
haben / reiner / lustiger / heller / vnd subtiler sein / ewig
gesund / frisch vnd on allen wandel vnd mangel / Ja
wir werden dem verklärten Leib Christi / vnser Br-
ders / ehnlich sein / nach dem spruch zum Phi. am 3^o

Da wird denn das verwesliche auffstehen vn-
nerweslich / was zumor in vnehrn geseet ist / wird
auffstehen in herrligkeit / was vnkressftig geseet /
wird auffstehen in kressft / Vnd wird sein ein Geist-
licher Leib / der ein himlisch geistlich leben hab / vnd
newe / sonderliche eigenschafft / die er zumor nicht ge-
habt hat / Wie zum Corint. in der 1. Epist. am 15. Cap.
mit schönen vnd lieblichen worten beschrieben wird.
Denn es wird ein solche herrligkeit sein / die Gott be-
reit hat denen / die in lieben / das kein ange gesehen
hat / kein ohre gehört / vnd in keines Menschen her-
tzen komen ist / Da wird Gott sein alles in allen. Itzt
werden wir durch mittel dis lebens / als durch speis /
trancck / Kleidung / element vn anders erhalten / Item /
müssen haben Obrigkeit / Prediger / vnd dergleichen.
Dort aber wird alle erhaltung geschehen / one solche
mittel / allein durch den anblick Gottes / welcher mehr
speisen vnd erhalten wird / denn itzt alle Küchen vnd
Apoteken thun können.

B

Das

Das ich aber widerkome / auff die sprach des heiligen Geistes / das der Tod ein schlaff sey / spricht nicht der Herr Ihesus Christus selbs in der Historien des verstorbenen Lazari? Lazarus vnser freund schlefft / aber ich gehe hin / das ich in auffwecke / Der gleichen zu Capernaum / da des Obersten Pfarherr's Töchterlein gestorben war / spricht er vor dem grössten hauffen des Volcks / das sich zum Begrebnis versamlet hat: Das Megdlein ist nicht tod / sondern es schlefft / Spottet also des Tods / als ein DRAK des lebens / vnd heist in ein schlaff / Dabey lernen wir / das bey allen sterbenden Menschen / grosse vnd doch verborgene Mirakel vnd Wunder geschehen / nicht allein das die Seel vnsterblich bleibt / vnd versamlet wird zur schar der Auserweltsen / sondern auch das der Leib / der nun zu nicht wird / verweset vnd verfaulet / wird nicht verweslich etc.

Das ist nun die newe sprach / die der heilig Geist vns Menschen fürhelt / das todt sein / heist nicht todt sein / sondern leben. Denn was da lebet kan nicht todt sein. Der sprach müssen wir gewonen / vnd dieselb wol lernen / ob sie gleich der vernunft hart eingehet / Menschliche gedancken führen nichts anders / denn ir weheklagen von jamer vnd elend dis lebens / Vnd haben ire Todtenpfeiffer / die ligen allein darauff / was todt ist / das ist todt / vnd wird des Herrn wort verlacht / das er sagt / der todt sey ein schlaff.

Wir aber sollen in den hohen Götlichen wercken / als dis auch ist / nicht vnser gedancken / Sondern Gottes reden / mit demütigem vnd einfeltigem hertzen hören / Der es denn nicht allein mit worten / sonder auch mit der that bezeuget / das das sterben sey ein leben / Vnd heist es nur geseet werden auff den acker Gottes /

Gottes / Da wir nun solchen hohen trost in vnser en-
ges hertz kōndten fassen / Ah lieber Gott was für ein
freud würde vnter vns sein. Würde doch ein Mensch
in seinem höchsten elend vor freunden hüpfen vnd
springen.

Derhalben last vns nun nicht trawrig sein vber
den verstorbenen / wie die andern / die keine hoffnung
haben / Last vns dem weheklagen / ein ziel vnd mass
setzen / das nicht daraus werde ein Heidnisch mur-
ren vnd vngedult wider Gott. Vber dem abschied der
jenigen / so vns lieb gewesen sind / mit hertzlichem seh-
nen bewegt werden / ist nicht sünd / Man lieset in der
Historien Lazari / das dem HErrn Christo die aus-
gen sind vbergangen. Denn Gott wil nicht / das wir
sollen sein Stoici / oder das sein geschöpff der Mensch
sol ein stein vnd ein klotz sein / in dem kein bewegung
sey / Ja Gott hat darumb die hertzliche sehnligkeit
der lieb zwischen Eheleuten / Item zwischen Eltern
vnd Kindern / vnd andern freunden vnd verwanten /
so man nennet Storgas / in die Natur der Menschen
geplantz / das sie nicht allein sein sollen / gleich als
band eines freundlichen holdreichen lebens der Men-
schen vntereinander / sondern auch fürbildung vnd
contrafactur der höchsten lieb Gottes gegen vns / vnd
das es Gott hertzlich wehe thue / so der mensch durch
Teuffels list von jm getrennet vnd abgefūret wird.

Darumb sind solche bewegung köstlich vnd gut /
allein das sie auch bleiben in irer mas / vnd nicht vber
das ziel schreiten / sich nicht mit vngestümmen geber-
den erzeigen / wie im dritten Buch Mose / am 19. Cap-
itel / von Gott ernstlich verboten wird.

Denn der Artickel der Auferstehung der Tod-
ten / wie wir denn im Christlichen Glaubē bekennen /
B ij ist gung

ist gnugsam bestetigt vnd confirmirt / nicht allein mit
klaren gezeugnissen der Schrift / Sondern auch mit
der Auferstehung Ihesu Christi / Wie wir denn in
dem Text angehört haben / das S. Paulus spricht /
Denn so wir glauben / das Ihesus gestorben vnd
auferstanden ist / so wird Gott auch / die da entschlaf-
ffen sind durch Ihesum / mit im führen. In der er-
sten zum Corinthern am 15. wird Christus genent der
Erstling deren / die da schlaffen / Denn so lauten die
wort / Nun aber ist Christus auferstanden von den
Todten / vnd der erstling worden vnter denen / die da
schlaffen / Sintemal durch einen Menschen der
Tod / vnd durch einen Menschen die Auferstehung
der todten kompt / Denn gleich wie sie in Adam alle
sterben / also werden sie in Christo alle lebendig ge-
macht werden / Ein iglicher aber in seiner ordnung /
Der Erstling Christus / darnach die Christum an-
gehörn / wenn er komen wird. Er wird aber darumb
der Erstling genent / das nun von wegen der krafft der
Auferstehung Ihesu Christi / ein grosser hauff mus
hinnach volgen / die der gleichen durch den Tod hin-
durch werden dringen / gleich wie die zal Eins / alle
andere zalen / gros vnd klein / anfehlet / zusammen ord-
net / vnd gleich hauffen der zal nach sich füret / für
sich selber aber blos vnd einzelich kein zal sein kan / All-
so wird als denn die Auferstehung Christi jr ende ha-
ben / vnd gantz sein / wenn auch alle andere glieder des
Leibs Christi werden auferweckt werden / vnd der
letzt feind der Tod auffgehoben wird / Da wird als
denn erfüllet werde das wort / Der Tod ist verschlun-
gen in den Sieg / Tod wo ist dein Stachel? Hell wo
ist dein Sieg? Vnd wir werden als denn bey dem
Herrn sein allezeit.

Sun

Zun Ephesern vnd an andern orten nennet Paulus Christum weiter auch das Heubt der Gemeine / So das Heubt eines Menschen / an einem volkommenen / gefunden / gantzen Körper lebt / so mus auch der Leib vnd alle Glieder des Leibs / als leber / lung / augen / hend / füsse / vnd andere nicht todt / sonder lebendig sein. Ist derhalben die Christliche Kirch von wegen ires lebendigen heubts des D^{er}ren Ihesu Christi / der zur rechten Gottes sitzt / schon im anfang des lebens mit allen Christen / vnd sol jr leben in den letzten tagen für allen Engeln vnd Creaturen offenbaret werden.

So folget derwegen / das / wie gesagt / das sterben kein Todt / sondern ein schlaff sey / vnd das wir nicht sollen trawren / wie die andern / die keine hoffnung haben.

Dieraus können wir nun ein gewissen beständigen trost fassen / das nach der sprach des Heiligen Geistes / diese Edle Person / vnser liebe Erbfraw / in Christo selige / so wir itzt zum erdreich bestaten / nicht gestorben / sondern entschlaffen sey vnd lebe / nicht allein nach der Seel / sondern auch nach dem Leib / ist jr leben mit Christo / in Gott verborgen / wie Paulus zun Colossern am 3. Capitel von den Christen redet.

Wir wöllen aber itzt ein wenig vom glauben vnd wandel dieser Christlichen Matron reden / Denn weil ein Mensch dem andern hie auff erden / mit bekenntnis des glaubens vnd Gottseligkeit sol fürgehen / vnd sein liecht lassen leuchten / für den Leuten / das der Vater im Himel gepreiset werde / ist es Christlich / dieser Gottsfürchtigen Person in dieser versammlung zudencken.

B ij

Diese

Diese vnser liebe Schwester in dem Herrn Chri-
sto / ist geborn aus dem hohen Geschlecht der von
Bunaw / welchs weit berhümet ist / auch in Meissen
vnd Sachsen / vnd sich bey den Römischen Keisern
vnd dem gantzen Römischen Reich / mit diensten vnd
andern trefflichen thaten / allzeit hoch verdienet / dar-
von die gantze Deudsche Nation mercklichen nutz
befunden / Vnd nach dem es so ein alter Stam ist / das
er in die acht hundert Jar zurück mag gerechnet wer-
den / ist wol zugleuben / das dis Geschlecht zur zeit
des ersten Deudschen Keisers Caroli Magni kün-
dig sey gewesen. Ir Vater Herr Günther von Bu-
naw Ritter / auff Elsterberg / in Gott seliger / ist vn-
ter dem Keiser Friderich dem dritten / vnd dem Kei-
ser Maximilian mit dienst / vnd im Krieg nicht der
geringste gewesen / In dem Krieg wider den Türcken /
zur zeit des Ungriichen Königs Mathieska / ist er
mit andern fürtrefflichen personen etliche Jar zu feld
gelegen / auch in einem harten grossen Winter. Wolt
Gott / wir hetten auch zu vnsern zeiten solcher dapffe-
rer Leut vom Adel viel / die mit solchem ernst wider
den Erbfeind des Christlichen namens streiten möch-
ten / Es würde der Türck sein Fus nicht so weit in
Deudschland herein setzen.

Ferner / dieser Tugentsamen Frawen Mutter ist
eine Spieglin / welche noch am leben ist / fast in die
80. Jar ires alters / Dis Geschlecht aber der Spiegel
ist auch der berhümpten eins / Herr Otto Spiegel /
ir Vater ein Ritter / ist beider Rechten Doctor ge-
west / hat etwan aus Welschland von Bononia viel
geschriebne Bücher / in Pbilosophia / Poeterey / Kei-
serlichen Rechten vnd andern mitbracht / die da one
gros gelt nicht erzeuget sind / vnd daraus haben viel
Gelarte /

Gelarte/etlicher Bücher Correcturn gezogen. Vnd
wiewol nu dis etwa allein Fürstliche thaten gewesen
sind/Biblioteken vnd Libereien aufzurichten/nütz-
liche Bücher in allen Professionen zu erhalten/ als
man liest vom König Ptolemaeo Philadelpho vnd
andern/ So ist doch der vleis etwan bey den Vorel-
tern vom Adel/ auch gewesen/ ehrliche Studia/ gute
Disciplin zuerhalten/vñ die Gottesdienst zufördern/
Nicht wie itzt jr viel vom Adel jr leben für das meiste
teil mit sauffen vnd fressen/vnzucht/schinderey/wu-
cher/vnnötigem gezencck vnd hoffart zubringen.

Was aber für einer hohen Person/ des alten Ge-
schlechts der Metzchen/ vnd mit was gaben/ ver-
stand vnd Tugend dieselbe für viel andern vom Adel/
von Gott begnadet vnd gezieret/ welcher diese vnser
entschlaffene Schwester ehelichen vertrawet ist ge-
wesen/wil ich itzt zuerzelen vbergehen.

In solcher grosser herligkeit aber des geblüts vnd
der geburt/vnd was andere ding mehr sind/welches
alles one das sonderliche neigung gibt zu grosser tu-
gend vnd erbarkeit/ So vbertrifft weit weit solches
alles dis stück/ das sie ein heilig/ auserwelt Gefess
Gottes des heiligen Geistes gewesen ist.

Was kan trefflichers von jr gesagt werden? Sie
mag wol gezelet werden vnter die heiligen Weiber/
Sara/Rebecca/vnd andere. Sintemal sie den schö-
nen schmuck vnd ornat gehabt/ So am 31. Capitel
des Spruchbüchlin Salomonis von einem Christ-
lichen/tugentsamen Weib beschrieben/ Derhalben sie
denn andern Weibern vom Adel zum Exempel nicht
vnbequem möcht fürgestellet werden.

S. Paulus fasset kürzlich solchen schmuck der
Christlichen Ehe weiber in der 1. zu Timothee am 2.
Erflich

Erstlich gedencckt er des Kinderzeugen / Gott hat diese Person mit irem gemahel dermassen gesegnet / das sie ein Mutter gewesen ist / achzehen Kinder / der etliche gestorben sind / Was aber sie da für arbeit / schmerzen / mühe vnd sorgen in solchem werck der gantzen Kinderzucht / ertragen hat / Können sorgfältige vnd vleissige Eheleut wol ermessen / Sie hat aber aus diesem Spruch Pauli gelernet / das Gott dem allmechtigen / solche werck des Ehestandes / wol gefallen / vnd das sie darin irem Schöpffer / mehr dienen könne / denn so sie sich in ein Kloster begeben / in den verfluchten vnseligen Nonnenstandt / danon Christus sagt / Matthei am 15. Vergeblich dienen sie mir / dieweil sie leren solche lere / die nichts denn Menschengesetz sind.

Vom schmuck Christlicher Eheweiber setzt Paulus weiter die vier stück / Nemlich Glaub / Lieb / Heiligung / Zucht.

Soniel den Glauben belangt / hat sie ire zunsicht gehabt / zu vnserm lieben Heiland vnd Seligmacher dem Herrn **JESU CHRISTO** / vnd sich seiner wolthaten / so er der gantzen Christlichen Kirchen durch sein bitter leiden vnd sterben / durch sein aufferstehung vnd Himelfart erworben vnd geschenckt hat / hertzlichen gefrewet / vnd sich ire sünde nicht lassen schreckē / oder zur verzweinelung treiben / Sondern festiglich darauff in irem hertzen beruhet / das der verdienst des Sons Gottes grösser vnd würdiger sey / denn die gantze last der Sünd aller Menschen.

Solchen Glauben hat sie in mancherley widerwertigkeit vnd Creutz durch jr gantzes leben geübt / fürnemlich aber die 27. wochen vber irer Franckheit /
vnd

vnd sich Gott mit gehorsam vnd gedult ergeben/vnd mit bestendiger hoffnung/ein ander seliges leben erwartet/Ir Gebet ernstlich gesprochen/vnd das tröstliche Betbuch des Psalters mit andacht gelesen/das sie auch den ort solcher vbung/in der stuben oder in dem gemach/da sie zu bett gelegen/iren Wurtzgarten genent hat.Vnd zwar es mag ja wol ein schönes lustiges Wurtzgertlin sein/ein solch hertz/in welchem der heilig Geist/durchs Wort/solche wolriechende Blümlin/des Gebets/der Dancksagung/des Glaubens/der Gedult vnd Gehorsams gegen Gott wirckt.

Die Lieb so Paulus vor das ander setzt/ist nicht gering an dieser Person gewesen/Da man solt erzelen/durch die 34. jar vber ires Ehestands/mit was reuerentz vnd ehrerbietung sie sich gegen irem Gemahel gehalten/wie sie des geschont/damit er nicht durch vbermessige künernis vnd sorgfeltigkeit/mit trawrigkeit beladen würde.Vñ was vor trew hat sie gegen demselben vnd all iren Kindern in dem vorgangnen Krieg des 47. jars/auch mit gefahr ires lebēs beweist/Sie hat hertzlich geliebt iren lieben Gemahel/ire liebe Söne vnd Töchter/ire Mutter/Brüder vnd Schwestern/vnd andere vorwandte. Vnd dieser vnzelichen gezeugnis/so sie bey den iren hat/das ir hertz rechter freundlicher vnd holdreicher lieb voll gewesen sey/wil ich itzt geschweigen/Allein kurtzlich sagen/wie sie mit wolthun/ire Liebe gegen den vnterthanen hat lassen schawen/da sie denn die werck der Barmhertzigkeit nicht gespart/ist gütig gewesen/hat guten rath geben in sachen/nach gelegenheit. Den Armen milde handreichung gethan/vnd in schulden entweder weitere frist geben/oder halb erlassen/vnd offtmals

C

Auch

auch gar geschencckt / Weibern die sie in Franckheiten
ersucht / labung / artzney / vnd rath nach vermügen
mitgeteilet / das sie gewest ist / gleich als ein Lands=
mutter / wie man liest von der Landgrefsin in Dörin=
gen Elisabeth / von der Sunamitis / vnd andern Gots
fürchtigen Weibern. Priester vñ Diener des göttliche
Worts haben nicht wenig förderung bey jr gehabt /
denn sie den selben von wegen ires Ampts sonderlich
geneigt vnd günstig gewesen. Vnd Kurtz / sie ist solcher
lieb vnd freundlichkeit gegen idermenniglich gewest /
das sie auch mit sonderlichem vleis / vnfried / gezencck /
vnd andern vnlust hat helffen dempffen vnd vnter=
drücken. Ist nicht eines bittern / boshafftigen ge=
müts befunden / wie denn sonst viel Weiber geartet
sind / die zu gezencck lust haben / vnd durch ire giftige
Zungen / viel mals ein gros Fewr anzündē / Als denn
gemeiniglich durch böse Zungē / an den Fürstenhöfen
vnd in den Herrschafften / Krieg / verwüstung der
Land vnd Leute / vnd ander vbel erregt werden / wie
die gemeine erfahrung ausweist.

Das dritte / als Weiligung / so da nach der schriftē
heist Keuschheit / kan auch löblich von jr gesagt wer=
den / Denn sie dem Ehebruch vnd Durerey feind ge=
wesen / vnd hat iren Ehestand / wie Christen gezie=
met / rein gefüret.

Der vierde schmuck Christlicher Ehe weiber ist
Zucht / Was solche tugend belangt / die man nennet
Modestiam, die da viel in sich schlenst / hat sie speis
vnd tranck / zur leibs erhaltung / nicht zu wollust ge=
braucht. Im reden vnd irem gantzen geberde ist sie
sittig vnd bedechtig gewest / Lügen sind jr gewest ein
grosser grewel / Vnd hat sich bevolien kein faul ge=
schwetz

schwetz aus irem munde gehen zulassen / sondern was
nützlich zur besserung gewesen / da es not gethan / das
es holdselig gewesen zuhören. Was sie wider hoffart
geredt / vnd wie hoch jr dieselb entgegen gewesen / wif-
sen die iren. Vnd wiewol sie des aus Göttlicher lere
vnterricht gewesen / das vnterscheid der Stende auff
erden / Gottes ordnung sey / hat sie doch irer herrlig-
keit / wie die liebe Esther / in demut gebraucht. Der
Haushaltung hat sie solchen vleis getragen / das da-
von nicht gnugsam mag gesagt werden / Vnd nach
dem sie sich in frembde vnnötige sorgen / die ires Ge-
mahels Herrschafft nicht angangen / leichtfertig ni-
cht gemenget / Ist durch solche heusligkeit vnd trew /
dem gantzen Haus Mila / wie der Freundschaft wol
kündig / mercklicher nutz / förderung vnd erhaltung
gefolget.

In Summa / Das ich von dieser Gottsfürchti-
gen Person zureden / entlich beschliesse / hat sie solchen
emfigen vleis zu Gottseligkeit gehabt / das sie nicht
allein gelesen / vnd Gottes Wort mit hertzlicher be-
gier angehört / Sondern auch jr hertz gegen Gott /
mit singen sich bevolien auszuschütten / das sie
gleich ein Chor in irer Kirchen vnd bey irer gemein /
öffentlich sampt iren Töchtern gehalten / wie denn im
Psalm stehet / Jüngling vnd Jungfrawen / alten mit
den jungen / sollen loben den Namen des HERN.
Vnd ist jr die größte beschwerung / die zeit vber irer
Leibs schwachheit gewesen / das sie nicht auch ein mal
bey irer Gemein / solche Lobfenge / mit öffentlicher
stimme sol pflegen. Ire vbung in Gottes Wort sind so
inbrünstig gewesen / das sie etliche Epistel des Apostels
Pauli hat anwendig gelernet / sonderlich die Epistel
zum Römern von wort zu wort können her sagen / als

C ij denn

Senn viel daran gelegen/das man zum vnterricht vnd
tröstung/ die wort heiliger göttlicher Schrift / aus-
drücklich / auch den Buchstaben nach behalte.

Aus diesem allen ist leichtlich abzunemen/das sie
recht den Tauffnamen gehabt/nemlich Katharina/
Das ist/ein Keine/wie das Griechische wort deutet/
Sintemal sie im glauben vnd wandel rein befunden.
Sie ist irrigen opinion feind gewesen/vnd da man vber
tisch im gesprech solcher gedacht / von mancherley
Secten vnd spaltung / in Religions sachen geredt/
hat sie offtmals gesagt/sie bleibe bey dem einfeltigem
verstand der Schrift / vnd bey dem brauch der Sa-
crament Christi / wie die Wort der einsetzung lauten/
Könne sich in solche verwirrung nicht schicken/dabey
las sie es bleiben. Ir wandel ist nicht mit mutwil-
ligen sünden/wider das gewissen/befleckt gewesen/wie
wol sie auch oft vber die widerspenstigkeit fleisch vnd
bluts geklagt/Wie denn alle Heiligen thun müssen/
Als auch Paulus der heilige hohe Apostel / zun Rö-
mern am 7. selbs klagt.

Letzlich / ir end hat sie also beschlossen/das sie in
dem Bekenntnis ires lieben Seligmachers Ihesu
Christi/ blieben ist / Vnd dem Son Gottes / irem tre-
wen Erlöser iren Geist in seine hende befohlen / ist also
seliglich den 21. Octobris / am tag Ursule / zwischen 4.
vnd 5. vhr gegen dem abend seliglichen / aus dieser
Welt zu der ewigen Kirchen im Himel abgeschieden.

Das aber nu solche hohe / heilige Person von vns
genomen / sollen wir vns nicht allzu sehr Heidnischer
weis entsetzen. Denn weil der Artickel der Auferste-
h. ng der todten ein bestendigen grund hat / vñ der tod
kein

Kein Tod ist / wie wir droben gehört haben / sollen wir
vns also wissen zu trösten.

Erstlich / das der abschied dieser Person / nicht one
rhat vnd willen Gottes geschehen / Weil Christus
sagt / das alle vnserer har auff dem heupt gezelt sind /
vnd das auch ein Sperling / ein geringer verechtlicher
Vogel / nicht one wissen Gottes von der höhe herab
falle oder sterbe / Viel mehr ein vernünfftige Creatur /
als der Mensch / kan nicht one willen Gottes sterben.
Denn mit Gottes willen werden wir geboren / mit
Gottes willen leben wir / mit Gottes willen sterben
wir . Derhalben wil vns Creaturn nicht gebüren / in
den willen Gottes zugreifen / vnd Gott zu meistern /
da er vns zur Schul füret / vnd die obediencz oder ge-
horsam gegen im neben andern nützlichen vbungem
wil leren.

Zum andern so hat sie ein trefflichen Schatz vber-
komen / den sie itzt vmb die gantze Welt nicht würde
geben / Denn sie ist bey irem Himlischen gemahel
dem Herrn Ihesu Christo / im Paradeis der Selig-
keit / helt gesprech mit im vnd allen Vetern / Patriar-
chen / Propheten vnd Aposteln / Ja mit allen heiligen
Weibern / Als Eua / Maria / Sara / Rebecca / Rabel /
vnd andern . Mit dieser Himlischē Kirch vnd versam-
lūg / das ich itzt der Engel geschweige / helt sie gesprech
von dem wunderbarlichen Radt Gottes / in dem
werck der Erlösung des Menschlichen Geschlechts /
vnd in dem werck der heiligung durchs Predigamt /
darin vergebung der Sünde / der heilige Geist / vnd
ewiges Leben mitgeteilet wird . Ob sie nu gleich vns
noch ein zeitlang hette können dienen / so sol doch ire
Seligkeit vnd freude / darin sie itzt ist / vnserm nutz für
gehen / Vnd sollen jr solche ewige güter / die wir auch
E iij hoffen

hoffen kurtzlich einzunemen / gerne ginnen. Denn weil jr gantzer Leib mit mancherley Franckheiten ver= derbt vnd zerrüt war / wer jr zeitliches leben / jr mehr ein vnlust vnd verdrus / denn ein lust gewesen / Vnd wir würden gebeten haben / das sie Gott von solchen schmerzen des Leibs erledigen hett wollen.

Zum dritten / sollen wir jrs abschieds darumb kein mißfallen tragen / denn dieser abschied ist nicht ein volkomener gantzer vnd ewiger abschied / sondern allein auff ein zeit. Vnd do wir wollen gegen ein= ander halten / die ewigkeit gegen der zeit / so wir noch zu leben haben / oder so lang noch sein wird / auff die gemeine aufferstehung der Todten / so ist gar ein kur= tze zeit / Ja es ist nicht recht ein punct oder minut ei= ner zeit zu heissen / gegen der ewigkeit / der verzug vnd auffschub / da wir einander wider in freuden anschaw en werden vnd beysam sein / nicht etliche jar / wie hie auff Erden / da wir doch endlich darnon müssen / sondern viel tausent / tausent jar. Vñ kan keine verglei= chung sein des das vnzelig ist vnd ewig / kein zeit noch zal hat / gegen dem das ein zeit hat / nicht ewig ist / vnd gezelt kan werden.

So ist nun dieser abschied der Menschen / nur ein wandern / wie einer vber land reist / vnd vber etli= che zeit widerkompt. Diesen trost haben nun nicht die Türcken vnd Heiden / allein die Christen / die Gottes wort hören. Darumb last vns vnser hertz stercken / vnd andere sinn vnd mutt fassen / denn ein Türck oder Heid / welche denn sterben / als ein Saw / one hoffnung eines künfftigen lebens.

Zum

Zum vierden/Do wir nu viel wollen trawren/
was richtē wir damit aus/oder was vor nutz bring-
tst: ist nicht also: wir widerstrebē endlich nicht allein
Gott/sondern auch verhindern mit solchem vnmut/
vnser gebet/ notwendige geschafft vnser beruffs vnd
anders/vñ verzeren vnsern eignen leib vnd das hertz/
welchs solche vbermessige bewegung nicht ertragen
kan/Syrach schreibt danon schöne wort im 30. vnd
38. Capitel/Sonderlich im 30. spricht er/ Traurig-
keit tödtet viel leut/ vnd dienet doch nirgent zu.
So ist es auch dieser vnser entschlaffnen Schwester
in dem HErrn Christo/will vnd gemüt nicht / das
wir vns am Leib mit trawrigkeit vnd vbermessigen
wehklagen sollen schadē thun/vnd das hertz also mit
schmerzen zureissen / Sondern do wir sie jtz solten
hören reden/würde sie sagen / Ah mein lieber Ge-
mahl/meine liebe Sōne vnd Töchter vnd all meine
Vnterthane/Ich bin jtz in der ruhe ewiger seligkeit
vnd freud/vieler sorgen vnd schmerzen/so bey euch
in ewerm leben noch sind/ entnomen / Solche ruhe
werdet jr mir ja gerne gönnen/ob ich euch nun durch
solche meine heimfart in die Himlische wonnung/ ein
stück grosser last vnd sorgen gelassen/ traget gedult/
vnterwerfft euch Gott mit willigem gehorsam / Er
wird als ein trewer Gott ewere last euch helffen tra-
gen/wie er denn versprochen hat/Matth.28. Ich bin
bey euch alle tage bis ans ende der Welt/ Item Esai.
46. Ich wil euch tragen bis ins alter vnd bis jr graw
werdet/Ich wil es thun/Ich wil heben vnd tragen
vnd erretten/Derselben zugesagten Göttlichen hülff/
die beides den gantzen Leib der Christlichen Kirch-
en /vnd eins glied in sonderheit betrifft/tröstet euch/
vnd

vnd streitet mit ewern vnmüt. Weiter auch so wollen wir Gott dem Allmechtigen hertzliche dancksagung thun/das er diese Edle Person/in die 52. Jar ires lebens/Als bald sie durch das Sacrament der Tauff/der heiligen Dreifaltigkeit zugeeigent ist / durch seinen heiligen Geist regirt hat/ vnd sie gemacht zu einem auserwelten Gefes Göttlicher wonung/vnd viel guts durch sie gewirckt hat.

Last vns aber Gott bitten / das er vns dergleichen auch regieren wolle / vnd das betriibt Daus Mila trösten / vnd demselben mit seiner Göttlichen hülf beistand thun. Darnach sollen wir iren vleis in Gottes wort vnd anderer Christlicher vbung nach vnser mas / nachfolgen / Gott vnsern Schöpffer / vnsern Erlöser den DERN Ihesum Christum / vnd vnsern Tröster den heiligen Geist lieben / fürchten / vertrauen / anruffen / vnd ein freundlichs / holdseligs leben mit vnserm Nechsten führen / vñ demselben guts zu thun nicht ablassen / Auch vnsern gantzen Wandel hie auff Erden also führen / das wir auch frölich mügen erwarten / das vnuergängliche / vnbesleckte / vñ vnuerwelckliche Erbe / vnd das Ende vnser Glaubens dauon bringen mögen / nemlich der Seelen seligkeit / Das verleihe vns Gott allen / durch seinen Son Ihesum Christum vnsern DERN /
A M E N.

Epicedion

EPICEDION: ♦

Oder Leichschriff / von dem seligen ab-
schied aus diesem leben / der Edlen vnd Tugentfa-
men Frauen Katharina / ehelichen gemahls
des Bestrengen / Edlen vnd Ernuhesten
Joseph Leuin Nickschen auff
Mila .

Der Anfang Gott / nach Adams fall /
Legt auff den Menschen viel trübsal /
Vnd spricht / zu aschen staub vnd erd /
Dauon du kompst / bald wider werd /
Wie nu Gott dis ein mal gebeut /
So müssen sterben alle Leut .

Das leben aber des weibes Sam /
Hat widerbracht dem menschlichen stam /
Vnd ob gleich icht der Mensch verwest /
In kurzer zeit doch wider geneest /
Wenn er zuuor zu Gott beuert /
Mit fried vnd freud von dannen fert .

Drumb wir der todten indeneck sein /
Gleich als der / die da leben sein /
Vnd hoffen solchs am jüngsten tag /
Zu befinden nach Christi zusag /
Das ist der aller beste trost /
Der vns von trawrigkeit erlost /
Abram vnd Jacob auch also /

D

Von

Von heitzen haben glaubet fro/
Dar sie begruben ire weib/
Der Sara vnd Rebecca lieb.

Hierauff ich kürzlich melden thu /
Den selign tod/ vnd sanffte rhu/
Eins edlen weibs/ an tugent reichs/
Gotts fürchtigen/ vnd ganz lobeleichs/
Der Ritterlich stam der Bunaw gut
Ire vrsprung ist/ vnd veterlichs blut/
Der Mutter halb/ die Spiegel sind/
Die man berumbt von thaten findt/
Zu Dhemen ir auch zugethan/
Vnd als man sieng zuschreiben an/
Der minder zal das zehend jar/
(Wie ich gehöret hab furwar)
Ist sie geboren vnd genandt/
Kathrina/ vnd Christo zuhandt
Da eingeleibet in der Tauff/
Mit dem ganzen Christlichen hauff/
Denn das ist recht die Adlich art/
Das sie ein Tempel Gottes ward/
Der heilig Geist durch der Eltern mund /
Sie lert vnd leit zu aller stund
Von pietet/ vnd erbarer zucht/
Gepreist wurd ir lob vnd gerucht.

Als solchs auch hört/ vnd wol bedacht
Zum ehelichn Gemahl nach ir tracht/
Der gestreng/ Ernuhest vnd Edle Herr
Joseph

Joseph Levin Neusch / löblich sehr /
Mit dem sie nun im Ehestand rein /
Bier vnd dreissig jar gelebt fein /
Vnd hat geleucht von tugend schon /
Recht / nach der weiblichn zierd vñ kron.

Denn wie da sol des Menschen lebn /
Gefelt sein / vnd geordnet ebn /
Auff Gott / sich selbs / vnd seinen Nechsten
Das thut vnd beweist sie am meisten /
Ihr hertz warhafftig Gott erkant /
Von glauben / lieb vnd hoffnung brant /
Der mund dancksaget vnd ruffet an /
Christum Jesum im höchsten thron.
Viel ja wol künlich sagen thun /
Wie sie Gott fürchten vnd lieben nun /
Sint doch allein from mit dem wort /
Aber dieses Edle weib fur fort /
Die Christlich lehr aus guten grund /
Zu schöpfen / ganz auswendig kund /
Was Paulus zu den Römern schreibt /
Vnd drin vor argumenta treibt /
Vmbfleng mit gunst die predigr gern /
Die solche stück recht köndten lern.

Ein frau / so gziert mit pietet /
Ist Gott dem Herrn gefellig stet /
Vnd entpfeht von jm / aus lautr gnad /
Gedeien / vnd segen / ohn schad.
Sie gab auch ehre irem leib /

D ij

Neusch

Keusch/rein/vnd messig allzeit bleib/
Auff das in jr der heilig Geist/
Ruhet vnd rastet vnbeschmeist/
Kein weiblich zierd möcht grosser sein
Denn so geschmückt jrs herzen schrein.

Dem nechsten/vnterthan vnd kind/
Ward sie zu helffen gmut vnd gind/
Die jrn auff zucht vnd erbarkeit/
Auff Gottes furcht stracks vnterweist/
An sanfftmüt vnd barmherzigkeit/
Ir nicht gebrach noch an warheit/
In ghor sam/lieb/ vnd aller trew/
Erhielt die Vnterthanen frey/
Zulindern pflegt der armen not/
Kadt/recht/vnd hülff denselbn erbot.

Da sich nun hat jr leben gar/
Gestrackt ins zwen vnd funffzigst jar/
Welchs nach der geburt des Herrn Christ/
Das zwen vnd sechs zigst gezelt ist/
Abfordert Gott von dieser erd/
Zur auserweltn vnd himlischen Herd/
Dieselb Matron/vnd nimpt sie auff/
Bis so lang der Jüngst tag herlauff/
Da leib vnd seel/ da haut vnd bein/
Sich widr zusam werd fügen rein/
Denn der sie erlöst hat Gotts Son/
Wirt jr schencken die ewige kron/
Wird sie erwecken durch sein krafft
Vnd

Vnd geben in allen gliedern safft/
Das sie widrumb frölich auffsteh/
Vnd vnuergenglich freud anseh/
So selig/so der gnaden voll/
Sind all/die Gott erkennen wol/
So gwis empfahe reichen lohn/
Die Christo recht vertrauet han/
So schon bekleidt der heilig Geist/
Welch hie sein wonung sind gewest.
Das wolln wir nu von herzu gönnen/
Der Edln vnd fromen Matronen/
Vnd hoffen auch an vnserm end/
Zuschliessen vns in Gottes hend.
Amen.

M. Iohannes Dolscius
faciebat.



Q iii

Syrach

Syrach am 22. Capitel.

Man sol nicht zu seer trawren ober dem Todten/denn er ist zur Ruge komen.

Am 30. Capitel.

Der Tod ist besser/ den ein siech Leben /oder steckfrankheit. Mach dich selbs nicht trawrig/ vnd plage dich nicht selbs / mit deinen eigen gedanken / Denn ein frölich hertz ist des Menschen leben / Vnd seine freude ist sein langes leben. Thu dir guts/ vnd tröste dein hertz/ vnd treib trawrigkeit fern von dir / Denn trawrigkeit tödtet viel Leute/ vnd dienet doch nirgend zu.

Am 38. Capitel.

Mein Kind/ wenn einer stirbt/ so beweine in/ vnd klage in als sey dir gros leid geschehen / vnd verhülle seinen Leib gebürlicher weise / vnd bestate in ehrlich zum Grabe. Du solt bitterlich weinen/ vnd hertzlich betrübt sein/ vnd leide tragen/ darnach er gewest ist/ zum wenigstē ein tag oder zween / auff das man nicht vbel von dir reden müge / Vnd tröste dich auch wider/ das du nicht trawrig werdest/ Denn von trawren kompt der Tod / vnd des hertzen trawrigkeit schwecht die kreffte.

Trau-

Trawrigkeit vnd armut thut dem herken
wehe in der anfechtung/ vnd vbertrit.

Las die trawrigkeit nicht in dein Hertz/son-
dern schlahe sie von dir/vnd dencke ans ende/vnd
vergifs nicht / Denn da ist kein widerkomen / es
hilfft in nicht/vnd du thust dir schaden. Gedencck
an in wie er gestorben/so mustu auch sterben/Ge-
stern wars an mir/Heute istis an dir.

Weil der Tode nu in der ruge liegt/ So höre
auch auff sein zugedencken / vnd trö-
ste dich wider vber in / weil sein
Geist von hinnen ge-
scheiden ist.



Zc 6385 AK


[Faint, illegible text, likely bleed-through from the reverse side of the page]

[Faint, illegible text, likely bleed-through from the reverse side of the page]

[Faint, illegible text, likely bleed-through from the reverse side of the page]

M.C.






QK.303 18

v. Metzsch (X1993119)

Z c
6385

Eine Reichpredigt /
Geschehen bey dem Begrebnis der Chri-
stlichen / Edeln vnd viel tugentsamen Frauen/
Katharina Metzschin auff Mila / geborne
von Bunaw auff Elsterberg /
Durch
M. Augustin Dölken / jetziger zeit
Diacon zu Reichenbach / am
XXIII. Octob.



UNIVERSITÄTS-BIBLIOTHEK
HALLE
(BAULE)

BIBLIOTHECA
PONICKAVIANA

Gedruckt zu Witteberg durch
Lorenz Schwenc.
1 5 6 2,
20